

事齊宣王宣王不能用適梁梁惠

王不果所言則見以為迂遠而闊

於事情按史記梁惠王之三十五年乙酉孟

子先事齊宣王後乃見梁惠王襄王齊湣王獨孟

子以伐燕為宣王時事與史記荀子等書皆不合

而通鑑以伐燕之歲為宣王十九年則是孟子先

游梁而後至齊見宣王矣然考

異亦無他據又未知孰是也

當是之時

秦用商鞅楚魏用吳起齊用孫子

田忌天下方務於合從連衡以攻

伐為賢而孟軻乃述唐虞三代之

德是以所如者不合退而與萬章

之徒序詩書述仲尼之意作孟子

七篇趙氏曰九百六十一章二萬四千六百

八十五字韓子曰孟軻之書非軻自著軻

既沒其徒萬章公孫丑相與記軻所

言焉耳愚按一說不同史記近是

韓子曰堯以是傳之舜舜以是傳之

禹禹以是傳之湯湯以是傳之文
武周公文武周公傳之孔子孔子
傳之孟軻軻之死不得其傳焉荀
與揚也擇焉而不精語焉而不詳